

文献之窗

乾嘉中苏城四大藏书家

瞿风起

清之中叶，提到藏书家，往往首推黄丕烈，其实同时尚有三家，肯与匹敌。黄丕烈于宋蜀刊《姚少监文集》跋文云：“《姚少监文集》，有翰林国史院官书朱印，香严所得，壬申五月十一日为余五十贱辰，以是书赠。”札云：“尚是宋板宋印，且有元官印可宝，聊以当祝。”“香严喜藏书，今年已七十外，知余有同嗜，踪迹甚密，余每购一书，必往借所藏秘本证之，二十年来，可为同志之友，抱冲、寿阶，先后下世，唯周丈与余一老一艾，孜孜于故纸堆中寻活计，可喜亦可忧也。”又云：“己卯秋重展，去香严歿五月余矣！”缘据黄氏跋文之至意，汇录四家之藏书事迹于一云。

周锡瓚，字仲涟，一字漪塘，又号香严居士，居阆门外马铺桥。黄丕烈称其丈，当为前辈。黄氏藏书虽富，居恒往借秘本相证，同时学者钱辛楣、段茂堂辈，亦常过从借阅，知其所藏，每多为诸同好者所未备。传至季子谢盒，号研六居士，家渐中落，宋

元槧本及精钞秘本，渐渐散佚，先后归黄氏者甚多，亦有为香严生前所投赠者。所著《琴清阁书目》、《漱六楼书目》，稿成未刻。

袁廷桢，又更名廷寿，字又凯，号寿阶，吴县人，居金昌亭畔。题其读书之室曰三砚斋，后又得名砚二，复颜其楼曰五砚。寿阶为明六俊之后，与黄丕烈结婚，其子为黄氏婿。卒年四十有七。蓄书万卷，皆宋元精槧，秘笈精钞。再传而佚，有归其婿贝塘简香者，有归丕烈者。

顾之逵，字抱冲，广圻从兄，元和廩贡生，歿于丁巳（嘉庆二年），年四十五。瞿中溶輓诗云：“嗟嗟顾君好读书，百万牙籤皆玉轴。宋刊元印与明钞，插架堆床娱心目。一握书论一握珠，购来手自三薰沐。黄金散尽为收书，秘本时时出老屋。”又云：“令弟风流歎阿兄，遗书谨守藏家塾。编乞名公作传铭，一瓿和泪重编录。”其藏书处曰小读书堆，所著有《一瓿录》。

黄丕烈，字绍武，号尧圃，居苏城悬桥巷，后徙饮马桥巷，乾隆戊申（五十三年）举人。喜藏书，得宋刻百余种，颜其室曰“百宋一廛”，顾广圻为之赋，而自为注，分述版刊先后，兼示得书源流，考订甚详，惟所定北宋本，有过誉者。藏书中跋语居多，后之好古者，先后辑成题识集录，迄今书林传为嘉话，于校勘天水旧槧，视作南针。丕烈复恒于岁暮遍约同好者各携当年所得之珍本，集中举行祭书，除题咏外，绘图记载以誌盛。丕烈除名号外，别署尤多，往往于题跋中见之，或题尧夫，亦曰老尧，自署复翁，亦曰复初氏，复见心翁，又号甘止醒人。五十后号知非子，晚年自号抱守老人。六十一岁时自署清秋逸叟。其藏书之印曰百宋一廛，曰士礼居，曰读未见书斋，曰陶陶室。所著近体诗，有述德继声、省余游草、问梅诗社集各刻，则在若存若亡之间。吴枚庵氏辑印须又续集，存古近体十首，其全帙亦未之见也。幸有好事者辑为《士礼居遗诗》若干卷，望更有同志为之付梓，以传不朽云。